

Alam Wanita

KEMAJUAN KAUM IBU MESIR

Dalam karangannya ini, Puan Zabedah al-Amrūsī – isteri Duta Mesir di Jakarta, menggambarkan kemajuan wanita Mesir dalam segala lapangan – P.

Pada zaman dahulu, puteri desa menjadi hamba suaminya, sesuai dengan aturan hidupnya yang telah berkurun-kurun lamanya. Ia mesti membantu ayahnya, suaminya, saudaranya yang lelaki dan sebagainya, dalam pekerjaan di ladang-ladang. Tetapi sekarang kaum petani telah mengerti apa erti pendidikan dan pelajaran, maka mereka telah menetapkan akan memberikan kepada anak-anak perempuan dasar-dasar pertama daripada ilmu pengetahuan yang semenjak lama diperlukannya. Kaum petani itu mengirimkan anak-anak perempuannya ke sekolah-sekolah pemerintah, tempat memberikan pelajaran percuma, dan selain daripada belajar membaca, menulis dan menghitung, mereka belajar juga pokok pengetahuan tentang rumah tangga dan kesihatan.

Dipusat-pusat pekerjaan masyarakat, kementerian-kementerian masyarakat, kesihatan dan pendidikan bekerjasama dalam memperbaiki keadaan kaum wanita dan mempertinggi tarap hidupnya. Mereka bertujuan membangunkan keturunan baharu, yang layak bagi melaksanakan tugas suci yang menjadi kewajipan wanita di dalam masyarakat.

Dalam kalangan keluarga-keluarga yang lebih beruntung daripada yang tersebut tadi, anak-anak perempuannya pun belum merasa puas dengan ilmu pengetahuan yang diperolehinya di sekolah-sekolah

rendah dan sekolah-sekolah menengah. Kebanyakan mereka dari berbagai-bagai peringkat, baik yang di bandar Kaherah ataupun yang di Iskandariah, melengkapkan pelajarannya di salah satu sekolah pertukangan ataupun di salah satu kolej, malah banyak diantaranya yang dihantar ke Eropah bagi memperoleh Degree di berbagai-bagai universiti, telah kembali ke Mesir dengan menyandang degree M.A. atau PhD. bertambahnya mahasiswa nyata kelihatan, dan dalam beberapa hal mereka menjadi kebanggan orang tuanya. Berkat ilmu pengetahuan yang telah didapati itu, dapatlah mereka menjadi pegawai negeri atau bekerja di syarikat-syarikat seperti saudara-saudara sejenis di Barat. Selain daripada itu banyak pula yang telah mendapat kedudukan yang penting dalam lain-lain lapangan.

Mesipun demikian, kemajuan mereka yang berupa kebendaan ini tidak menghalangi daripada menunaikan tanggung jawab mereka yang utama iaitu menjadi ibu-ibu yang baik. Dalam hal ini, negara sangat banyak berhutang budi kepada mereka.

Setelah tamat Perang Dunia yang pertama, kira-kira pada tahun 1919, wanita-wanita Mesir mulai menuntut hak yang sama dengan kaum lelaki. Banyak pertentangan telah timbul apabila timbul gerakan membuang tudung – purdah.

Dari Sejarah

Sayugia disebut, rakyat Mesir telah memberontak menentang penjajah dengan mengalami berbagai-bagai penderitaan dari semenjak tahun 1919 hingga tahun 1951. Dalam masa itulah wanita-wanita Mesir berjuang berganding bahu dengan suami-suami mereka di medan pertempuran bagi membebaskan tanah air. Sudah selayaknya, sesudah banyak pengorbanan yang telah diberikan, maka mereka pun mencari jalan yang sesuai dengan kebolehannya.

Peranan yang telah dijalankan oleh kaum wanita dalam kehidupan sesuatu bangsa memang sangatlah besar dengan tidak syak lagi. Ini memang pada tempatnya kerana mereka lah yang memelihara keturunan yang sedang muncul dan akan berbakti kepada tanah airnya.

Oleh kerana itulah, maka Kementerian Pendidikan Masyarakat, berusaha memberikan kaum puteri pendidikan yang bermutu bagi persiapan kaum puteri menjalankan peranan masing-masing.

Sekolah-sekolah

Bagi menjalankan tujuan ini, Kementerian Pendidikan Masyarakat telah mendirikan sekolah-sekolah untuk kaum puteri dalam berbagai-bagai daerah dalam negara. Sekolah-sekolah itu banyak jenisnya dan banyak pula jenis pelajarannya dengan dipenuhi oleh kaum puteri dari berbagai-bagai peringkat. Jumlah sekolah-sekolah rendah bagi kaum puteri telah bertambah menjadi 100 dengan mempunyai 1000 darjah atau kelas dan mempunyai 26,000 murid. Ini, hanya di bandar Kaherah. Bandar Kaherah juga mempunyai sekolah-sekolah menengah untuk kaum puteri berjumlah 52 buah dan mempunyai murid-murid sebanyak 16,000 orang.

Selain daripada sekolah menengah yang bertaraf ilmiah, ada pula sekolah-sekolah menengah yang menjadikan puteri-puteri Mesir

menjadi pengemudi rumahtangga.

Kaum puteri Mesir juga mempunyai Kolej Kesenian Kolej Muzik, Kolej Soal-Soal Masyarakat dan tiga buah kolej perniagaan yang menyediakan kam wanita membuka perusahaan dan untuk bekerja dalam bank.

Dalam Pendidikan Universiti, kaum puteri tidak ketinggalan. Ada tiga buah universiti – di bandar Kaherah 2 buah dan di Iskandariah sebuah - yang menerima mahasiswa puteri. Universiti bandar Kaherah sahaja mempunyai 1400 orang mahasiswa dari kaum puteri dalam berbagai-bagai bahagian – fakulti.

Usaha-Usaha Wanita

Dalam lapangan agama, kaum wanita mengambil bahagian yang cergas dengan terdirinya perkumpulan “Muslimat”: selain daripada berusaha dalam lapangan kebajikan masyarakat maka pertubuhan in bergerak terus memperkembangkan kebudayan Islam. Pelajaran dan ceramah-ceramah yang diberikan olehnya terus menerus dan teratur.

Kaum Ibu Mesir telah menunjukkan usahanya yang bersungguh-sungguh dalam dunia persuratkhabaran. Ada beberapa buah majalah disunting dan diterbitkan oleh wartawan-wartawan wanita Mesir. Majalah ini kebanyakannya mengupas soal-soal masyarakat.

Barangkali kejayaan yang sangat besar yang telah dicapai oleh wanita Mesir ialah sumbangannya kepada kesejahteraan masyarakat dalam negara. Dengan sambil lalu dapatlah saya sebutkan beberapa perkumpulan wanita Mesir, seperti al-Hilāl al-Aḥmar dan Mubarat Muhammad ‘Ali, yang namanya terkenal di dunia internasional kerana usaha-usaha perikemanusian.

Selain daripada itu ada pula perkumpulan wanita Mesir yang bernama “Perkumpulan Bagi Memajukan Kesihatan Wanita”, yang pada tahun-tahun yang akhir ini telah menjaga

kesihatan anak-anak miskin. Berkat usaha-usahanya telah dapat dibangunkan sekolah “Bandar Kesihatan”, demikian nama bandar yang menjadi contoh tauladan, dan yang pada masa ini menjadi tempat perumahan bagi hampir-hampir 2,000 kanak-kanak dari berbagai-bagai umur yang telah diselamatkan dari kesengsaraan dan dari serangan penyakit Tibi yang sangat mengerikan itu.

Demikian pula, dalam soal membanteras buta huruf, kaum wanita Mesir telah memberi sumbangan yang cemerlang.

Wanita-wanita Mesir Yang Terkemuka

Di antara wanita-wanita Mesir yang terkemuka dan yang ulungnya ialah Almarhumah Safiyyah Zaghlūl Pemimpin Kebangsaan Mesir yang terkenal dengan gelaran “*Umm Al-Misriyyin*” (Ibu Bangsa Mesir). Beliau telah memberi sepenuh-penuh sokongan dan menolong usaha suaminya (Saad Zaghlūl) dalam perjuangannya.

Kemudian daripadanya ialah almarhumah Hudā Sha‘rāwī, yang namanya bertali dengan gerakan wanita Mesir sebagai pejuang hak-hak wanita. Orang yang melanjutkan perjuangan Hudā Sha‘rāwī ialah Saiza Nabarawiy dan Hawa’ Idrīs.

Seorang lagi pejuang hak wanita yang namanya sekarang sedang terkenal ialah Duriah Shafiq pemimpin perkumpulan “*Bintu Al-Nīl*” (Puteri Sungai Nill). Kita masih ingat bahawa Duriah dan rakan-rakannya telah mogok lapar selama beberapa hari dalam permulaan tahun 1954 bagi mendapat hak-hak politik. (Menurut undang-undang dasar Republik Mesir yang telah diluluskan tidak berapa lama dahulu, perempuan-perempuan Mesir diberikan hak suara – mengundi – P.)

Wanita Mesir dan Persuratan

Dalam lapangan syair dan persuratan, terkenal ‘Ai’shah Al-Taymūriyyah dan Malak Nasif yang terkenal dengan gelaran “Bāḥathah Al-Badiyyah”.

Seorang lagi yang sangat terkenal dalam persuratan Arab ialah Doktor ‘Ai’shah Abd Rahman, lebih terkenal dengan nama penanya “Bintu Al-Shati” (buah penanya sentiasa menghiasi majalah “Al-Hilāl” dan akhbar “Al-Ihrām” – P.)

Bacalah!

Hampir Siap!

KHĀLID IBN AL-WALĪD

oleh

ABDULLAH BASMIH

Riwayat Hidup Pahlawan Islam yang Terbilang
Pintalah kepada penerbitnya: Qalam, Singapura.
